



Broj: 152/19
Sarajevo, 19.02.2019. godine

19-02-2019

Kanton Sarajevo
Ministarstvo za rad, socijalnu politiku, raseljena lica i izbjeglice

PREDMET: Zahtjev za preispitivanje utvrđene reprezentativnosti sindikata, traži se

Na osnovu člana 132. i 134. Zakona o radu („Službene novine FBiH“ broj: 26/16 i 89/18), a imajući u vidu da su nastupile nove činjenice i okolnosti koje utiču na dalje postojanje i opstanak utvrđene reprezentativnosti pojedinih sindikata, Sindikat radnika u zdravstvu u Kantonu Sarajevo podnosi Zahtjev za preispitivanje reprezentativnosti sljedećih sindikata:

1. Sindikat doktora medicine i stomatologije Kantona Sarajevo kome je reprezentativnost utvrđena Rješenjem broj: 13/04-05-1586/17 od 23.02.2017. godine,
2. Sindikat Kliničkog centra Univerziteta u Sarajevu kome je reprezentativnost utvrđena Rješenjem broj: 13-04/2-34-32192/17 od 27.12.2017. godine i
3. Sindikat radnika u zdravstvu u Kantonu Sarajevo kome je reprezentativnost utvrđena Rješenjem broj: 13-05-6496/16 od 22.07.2016. godine.

1. Rješenjem ovog organa broj: 13/04-05-1586/17 od 23.02.2017. godine utvrđeno je da je Sindikat doktora medicine i stomatologije Kantona Sarajevo reprezentativni sindikat za područje (granu) djelatnosti doktora medicine i stomatologije na području Kantona Sarajevo. U obrazloženju predmetnog rješenja se, između ostalog, navodi da je naslovljeni organ cijeneći materijalne dokaze iz spisa utvrdio da Sindikat doktora medicine i stomatologije Kantona Sarajevo broji 830 članova, da je prema aktu Federalnog Zavoda za statistiku broj zaposlenih na području Kantona Sarajevo u djelatnosti medicinske i stomatološke prakse (grana 86.2.) sa stanjem decembar 2016. godine 3.953 osobe, da taj broj zaposlenih obuhvata i ostalo osoblje u grani djelatnosti medicinske i stomatološke prakse, te je prihvatio informacije Stomatološke komore FBiH da su na području Kantona Sarajevo zaposlena 434 doktora stomatologije, dok je od Ljekarske/Liječničke komore Kantona Sarajevo dobio podatak da na području Kantona Sarajevo ima 1614 ukupno aktivnih ljekara. Nadalje se navodi da Sindikat doktora medicine i stomatologije Kantona Sarajevo ima 40,00% članova od ukupnog broja zaposlenih u djelatnosti doktora medicine i stomatologije, utvrđenog na osnovu podataka dostavljenih od strane Ljekarske/Liječničke komore Kantona Sarajevo i Stomatološke komore FBiH, pa je utvrđeno da Sindikat doktora medicine i stomatologije Kantona Sarajevo ispunjava uslove iz člana 124. Zakona o radu.

Zbog propusta prilikom donošenja rješenja, broj i datum gornji, a koji se ogledaju u postupanju suprotno pravilima postupka, nepotpuno i nepravilno utvrđenom činjeničnom stanju i nepravilnoj primjeni materijalnog prava, podnositelj ovog Zahtjeva je 10.05.2017. godine podnio tužbu Kantonalmu sudu u Sarajevo radi poništenja predmetnog rješenja. Po podnesenoj tužbi, Kantonalmu sud u Sarajevu je 11.02.2019. godine donio Presudi broj: 09 0 U 028698 17 U kojom se „tužba uvažava, osporeno rješenje poništava i predmet vraća tuženom na ponovni postupak“. U obrazloženju presude, broj i datum gornji, se navodi da „tuženi nije mogao izdvojiti djelatnost doktora medicine i djelatnost stomatologa, jer u nomenklaturi ta djelatnost ne postoji, te su pogrešno primjenjene odredbe članova 123., 124., 125. i 127. Zakona o radu.“ Nadalje se navodi da Odlukom o klasifikaciji djelatnosti BiH 2010 („Službeni glasnik BiH“ broj: 47/10) djelatnost zdravstvene zaštite klasifikovana je u Područje „Q“ kao: „djelatnost zdravstvene zaštite i socijalne skrbi“ s tim da je oblast djelatnosti



zdravstvene zaštite razvrstana pod rednim brojem 86. te Odluke i da je ta oblast razvrstana na tri grane djelatnosti, i to. 86.1. Djelatnosti bolnica, 86.2. Djelatnosti medicinske i stomatološke prakse i 86.9. Ostale djelatnosti zdravstvene zaštite, te da Sindikat doktora medicine i stomatologije Kantona Sarajevo ima članove koji su zaposleni u sve tri navedene djelatnosti, te je bila obaveza postupajućg organa da pribavi podatke i utvrdi tačan broj zaposlenih u sve tri djelatnosti, pa nakon toga ocijeni da li navedeni sindikat ima uslove u pogledu reprezentativnosti po odredbama člana 124. Zakona o radu, stavljajući u odnos broj članova tog sindikata sa ukupnim brojem zaposlenih u sve tri navedene grane (djelatnosti).

O tome da naslovljeni organ nije mogao **izdvojiti djelatnost doktora medicine i djelatnost stomatologa**, podnositelj zahtjeva je istakao kako u tužbi, tako i tokom kolektivnih pregovora koje je vodio 2017. i 2018. godine. Naime, nesporno je da Sindikat doktora medicine i stomatologije Kantona Sarajevo ispunjava uslove iz člana 122. tačka a) i b) Zakona o radu. Međutim, Sindikat doktora medicine i stomatologije Kantona Sarajevo ne ispunjava uslov propisan tačkom c) člana 122. Zakona o radu, tj. nema potreban procenat učlanjenosti zaposlenih u skladu sa ovim zakonom, odnosno nema neophodni minimum od 30% članova od **ukupnog broja zaposlenih u području djelatnosti (grani) na području kantona**, a što je potvrdio i Kantonalni sud u Sarajevu presudom, broj i datum gornji. Naime, broj članova Sindikata doktora medicine i stomatologije Kantona Sarajevo (830 članova) se stavlja u odnos sa 8.385 koji je ukupan broj zaposlenih osoba u djelatnosti zdravstvena zaštite u Kantonu Sarajevo, a ne u odnos sa ukupnim brojem doktora medicine i stomatologije na nivou Kantona Sarajevo. Također, broj zaposlenih se utvrđuje na osnovu podataka nadležnih organa, tj. Federalnog Zavoda za statistiku koji je, shodno Zakonu o statistici FBiH („Službene novine FBiH broj: 63/03 i 9/09), jedini nadležan organ za poslove statistike u FBiH i čiji podaci i informacije predstavljaju zvanične podatke i obavezno se koriste pri utvrđivanju zajedničkih osnova i mjerila za određivanje prava, obaveza i odgovornosti pojedinih subjekata u FBiH a ne prema podacima, u konkretnom slučaju Stomatološke komore FBiH i Ljekarske/I.lječničke komore Kantona Sarajevo. U vezi ostalih navoda i tvrdnji iz tužbe, podnositelj zahtjeva upućuje na tužbu, a koja je dostavljena naslovljenom organu u junu 2017. godine.

Tvrđnje podnosioca zahtjeva, Kantonalni Sud u Sarajevu ocjenio je osnovanim, te donio presudu, broj i datum gornji, sa uputom naslovljenom organu da u ponovnom zakonito provedenom postupku, a u skladu sa datim obrazloženjem upotpuni činjenično stanje predmetne stvari na koju će zatim primijeniti odgovarajuće materijalno pravo i donijeti novu odluku za koju će dati potpune i pravno valjane razloge.

Inače, pored Kantonalnog suda u Sarajevu, po istom činjeničnom i pravnom osnovu, presudu je donio i Kantonalni sud u Tuzli, a koja je potvrđena presudom Vrhovnog suda FBiH. Stav, kako kantonalnih, tako i Vrhovnog suda FBiH jeste da se reprezentativnost sindikata, prema pozitivnim propisima, određuje isključivo za područja djelatnosti, odnosno grane djelatnosti, a ne za struke.

Imajući u vidu sve navedeno, odnosno činjenicu da je Kantonalni sud u Sarajevu donio gore navedenu presudu, kao i presudu broj: 09 0 U 026915 16 U od 07.02.2019. godine, te da je po istom činjeničnom i pravnom osnovu i Kantonalni sud u Tuzli donio presudu broj: 03 0 U 016062 17 U od 29.06.2017. godine, a koja je potvrđena presudom Vrhovnog suda FBiH broj: 03 0 U 016062 17 Uvp od 18.10.2018. godine obraćamo se ovim Zahtjevom da preispitate reprezentativnost Sindikata doktora medicine i stomatologije Kantona Sarajevo, te pravilno i potpuno utvrdite činjenično stanje i na tako utvrđeno činjenično stanje pravilno primjenite relevantni metarijalni propis, a shodno uputama datim u presudi Kantonalnog suda u Sarajevo broj: 09 0 U 028698 17 U od 11.02.2019. godine.

U prilogu:

1. Presuda Kantonalnog suda u Sarajevo broj: 09 0 U 028698 17 U od 11.02.2019. godine
2. Presuda Kantonalnog suda u Sarajevo broj: 09 0 U 026915 16 U od 07.02.2019. godine
3. Presuda Kantonalnog suda u Tuzli broj: 03 0 U 016062 17 U od 29.06.2017. godine



4. Presuda Vrhovnog suda FBiH broj: 030 U 016062 17 Uvp od 18.10.2018. godine

2. Rješenjem ovog organa broj: 13-04/2-34-32192/17 od 27.12.2017. godine utvrđeno je da je Sindikat Kliničkog centra Univerziteta u Sarajevu reprezentativni sindikat za područje djelatnosti zdravstvene zaštite na području Kantona Sarajevo. U obrazloženju predmetnog rješenja se, između ostalog, navodi da je naslovjeni organ cijeneći materijalne dokaze iz spisa utvrdio da je Sindikat Kliničkog centra Univerziteta u Sarajevu upisan u registar kod nadležnog organa, da djeluje na području Kantona Sarajevo, da se finansira iz članarina zaposlenika Kliničkog centra Univerziteta u Sarajevu, da broji 2591 člana, te da Sindikat Kliničkog centra Univerziteta u Sarajevu ima 31,14% članova od ukupnog broja zaposlenih u djelatnosti zdravstvene zaštite u Kantona Sarajevo, pa je utvrđeno da Sindikat Kliničkog centra Univerziteta u Sarajevu ispunjava uslove iz člana 124. Zakona o radu.

Zbog propusta prilikom donošenja rješenja, broj i datum gornji, a koji se ogledaju u postupanju suprotno pravilima postupka, nepotpuno i nepravilno utvrđenom činjeničnom stanju i nepravilnoj primjeni materijalnog prava, podnositelj ovog zahtjeva je 05.04.2018. godine podnio tužbu Kantonalnom sudu u Sarajevo radi poništenja predmetnog rješenja i postupak je u toku. S obzirom na dužinu tranja sudskog postupka, u prosjeku oko dvije godine, a imaju u vidu relevantne odredbe Zakona o radu, obraćamo se zahtjevom za preispitivanje reprezentativnosti Sindikata Kliničkog centra Univerziteta u Sarajevu.

Prilikom donošenja rješenja, broj i datum gornji, zanemarena je odlučna činjenica da su članovi Sindikata Kliničkog centra Univerziteta u Sarajevu osobe koje su u radnom odnosu samo u Kliničkom centru Univerziteta u Sarajevo, dakle radnici kod jednog poslodavca, a što potvrđuju akti koje dostavljamo u prilogu. Naime, Zakon o radu (član 123., 124. i 125.) poznaje tri vrste reprezentativnosti sindikata, i to:

1. reprezentativnost kod poslodavca,
2. reprezentativnost za područje djelatnosti (grane) na teritoriji Federacije, odnosno području kantona i
3. reprezentativnost za teritoriju Federacije.

Dakle, Zakon o radu propisuje tri vrste, odnosno tri nivoa sticanja reprezentativnosti, pri čemu je nemoguće da jedan sindikat ima utvrđene dvije vrste reprezentativnosti, tj. reprezentativnost utvrđenu na dva različita nivoa što je u konkretnom slučaju. Naime, **Odlukom Kliničkog centra Univerziteta u Sarajevu broj: 0203-46868 od 17.10.2017. godine utvrđeno da je Sindikat Kliničkog centra Univerziteta Sarajevo reprezentativni sindikat radnika KCUS-a**, dok je rješenjem, broj i datum gornji, istom Sindikatu utvrđena reprezentativnost za područje djelatnosti zdravstvene zaštite na području Kantona Sarajevo.

Tačno je da je Statutom Sindikata Kliničkog centra Univerziteta u Sarajevu propisano da isti djeluje na području Kantona Sarajevo, kao što je tačno da je Statutom Sindikata Kliničkog centra Univerziteta u Sarajevu, između ostalog, propisano i: „Članovi Sindikata iz svake organizacione jedinice poslodavca delegiraju....“ - čl.11.st.2., „..... zaposlenici pojedine organizacione jedinice“ - čl.11.3., „Predsjedništvo vrši svoje ovlasti po organizacionim jedinicama poslodavca samostalno i preko sindikalnih povjerenika, jednog za svaku organizacionu jedinicu poslodavca“ - čl.24.st.1., „Član Sindikata može postati svaki zaposlenik poslodavca, kao i zaposlenici zaposleni u drugim sa zdravstvom povezanim djelatnostima....“ - čl.46.st.2.

Iako je kao područje djelovanja označeno područje Kantona Sarajevo, sam naziv „Sindikat Kliničkog centra Univerziteta u Sarajevu“, kao i odredbe Statuta Sindikata Kliničkog centra Univerziteta u Sarajevu, te informacije sa web stranice navedenog sindikata upućuju na zaključak da se radi o sindikatu koji djeluje samo na nivou poslodavca, odnosno samo na nivou Kliničkog centra



Univerziteta u Sarajevu i da su njegovi članovi i rukovodioci samo radnici zaposleni na Kliničkom centru Univerziteta u Sarajevu. To potvrđuju i podaci na web stranici Sindikata Kliničkog centra Univerziteta u Sarajevu: <http://www.kcus.ba/sindikat-ukes37da.html?su=>; kao što su:

- rubrika „O nama“ gdje je navedeno, između ostalog, da Sindikat Kliničkog centra Univerziteta u Sarajevu djeluje na nivou Kliničkog centra Univerziteta u Sarajevu;
- Rubrika članovi Predsjedništva: predsjednica Dr.sci. Dženana Hrustemović DMS, Klinika za kardiologiju – Interventna kardiologija, te članovi: Prim. dr Avdić Emir, Klinika za hemodijalizu – Satelitski dijalizni centar, Lejla Bogilović DMS, Klinika za torokalnu hirurgiju; Alen Pojata, fizioterapeutski tehničar, Klinika za fizijatriju i rehabilitaciju, Ifeta Bukva dipl. pravnik, Služba za opće poslove - protokol i Selim Halugić, blagajna. Pored klinike, odnosno radnog mesta su navedeni i brojevi lokala na koje se imenovani mogu dobiti, a koji su lokalni Kliničkog centra Univerziteta u Sarajevu, što znači da su članovi Predsjedništva osobe koje su u radnom odnosu na Kliničkom centru Univerziteta u Sarajevu;
- Rubrika članovi Skupštine Sindikata Kliničkog centra Univerziteta u Sarajevu: predsjednik skupštine je Prim.mr.sci.med.dr Duško Anić, Klinika za pedijatriju, dopredsjednici Mr.Sci.med.dr Damir Čelik, Klinika za fizijatriju i Mr. Admira Bajrović DMS, Klinika za psihiatriju, znači osobe koje su u radnom odnosu na Kliničkom centru Univerziteta u Sarajevu;
- Rubrika članovi Nadzornog odbora: predsjednik Šerif Hrustenpašić, med. tehničar, Klinika za psihiatriju, te članovi: dr Suvald Vuk, Klinika za anesteziju i reanimaciju i Šejla Borušić, Klinika za ortopediju i traumatologiju, što znači da su članovi Nadzornog odbora, također, osobe koje su u radnom odnosu na Kliničkom centru Univerziteta u Sarajevu;
- Rubrika povjerenici organizacionih jedinica, gdje su organizacione jedinice na čijem čelu su povjerenici identične organizacionim jedinicama Kliničkog centra Univerziteta u Sarajevu, tj. poslodavca, a što dokazuje da Sindikat Kliničkog centra Univerziteta u Sarajevu djeluje samo na nivou poslodavca;
- Rubrika Spisak Skupštinskih delegata iz kojeg se da zaključiti da su delegati Sindikata samo radnici koji su zaposleni na Kliničkom centru Univerziteta u Sarajevu.

Da Sindikat Kliničkog centra Univerziteta u Sarajevu djeluje samo na nivou poslodavca potvrđuje i način finansiranja gdje je u Izjavama predsjednice tog Sindikata broj ovjere: 202632 od 01.11.2017. godine i broj ovjere: 236791 od 26.12.2017. godine, kao i potvrdi Sindikata Kliničkog centra Univerziteta u Sarajevu broj: 1207-171 od 25.12.2017. godine izričito navedeno da se Sindikat Kliničkog centra Univerziteta u Sarajevu **finansira iz članarina uposlenika Kliničkog centra Univerziteta u Sarajevu**.

Ističemo i da je općepoznata činjenica da se, shodno pozitivnim propisima, sva udruženja, gdje spadaju i sindikati, registruju po odredbama državnog ili entitetskog Zakona o udruženjima i fondacijama jer još uvijek, nažalost, nemamo poseban Zakon o sindikatima. Da bi se postupilo po navedenom državnom ili entitetskom zakonu, statutom se mora odrediti i područje djelovanja udruženja, a najniži oblik tog djelovanja jeste područje jednog kantona, što znači da bi bilo koje udruženje formalno- pravno moglo učestvovati u pravnom prometu mora navesti područje djelovanja bar na nivou kantona, s tim što nadležna ministarstva koja vrše registraciju ne provjeravaju stvarno područje djelovanja udruženja. Dakle, registrovano područje djelovanja udruženja se, u konkretnom slučaju, ne podudara sa stvarnim djelovanjem Sindikata Kliničkog centra Univerziteta u Sarajevu koji je, da bi formalno pravno ispunio uslov za registraciju i postao sudionik u pravnom prometu kao područje djelovanja označio Kanton Sarajevo iako iz svega gore navedneog proizlazi da je područje djelovanja .. Sindikata Kliničkog centra Univerziteta u Sarajevu nivo poslodavca.

Imajući u vidu sve navedeno, a prije svega činjenicu da jedan sindikat ima utvrđene dvije vrste reprezentativnosti, tj. istovremeno utvrđenu reprezentativnost na nivou poslodavca i na nivou Kantona



Sarajevo, kao i da su njegovi članovi samo radnici Kliničkog centra Univerziteta u Sarajevu, da nema članove zaposlene u djelatnosti zdravstvene zaštite koja je shodno Odluci o klasifikaciji djelatnosti BiH 2010 razvrstana na tri grane djelatnosti, i to: 86.1. Djelatnosti bolnica, 86.2. Djelatnosti medicinske i stomatološke prakse i 86.9. Ostale djelatnosti zdravstvene zaštite, već samo u jednoj od tri navedene grane, te da je stvarno područje djelovanja Sindikata Kliničkog centra Univerziteta u Sarajevu nivo poslodavca, a ne područje Kantona Sarajevo obraćamo se ovim Zahtjevom da preispitate reprezentativnost Sindikata Kliničkog centra Univerziteta u Sarajevu, te pravilno i potpuno utvrdite činjenično stanje i na tako utvrđeno činjenično stanje pravilno primjenite relevantni metrialni propis.

U prilogu:

- Odluka Kliničkog centra Univerziteta u Sarajevu broj: 0203-46868 od 17.10.2017. godine
- Statut Sindikata Kliničkog centra Univerziteta u Sarajevu broj: 1207-02 od 06.06.2017. godine
- dokumentacija skinuta sa <http://www.kcus.ba/sindikat-ukcs?su=>, i to rubrike: Naslovna, O nama, Članovi Predsjedništva, Članovi Skupštine, Članovi Nadzornog odbora, Povjerenici organizacionih jedinica i Spisak skupštinskih delegata
- Izjava broj ovjere: 202632 od 01.11.2017. godine
- Izjava broj ovjere: 236791 od 26.12.2017. godine
- Potvrda broj: 1207-171 od 25.12.2017. godine
- uvid u <http://www.kcus.ba/sindikat-ukcs37da.html?su=>

3. Rješenjem ovog organa broj: 13-05-6496/16 od 22.07.2016. godine utvrđeno je da je Sindikat radnika u zdravstvu u Kantonu Sarajevo reprezentativan za područje djelatnosti zdravstvene zaštite na području Kantona Sarajevo. U obrazloženju predmetnog rješenja se, između ostalog, navodi da je naslovljeni organ cijeneći materijalne dokaze iz spisa utvrdio da broj članova Sindikat radnika u zdravstvu u Kantonu Sarajevo (6.129) predstavlja procenat od 73,10% od ukupnog broja zaposlenih u djelatnosti zdravstvene zaštite Kantonu Sarajevo, pa je utvrđeno da isti ispunjava uslove iz člana 124. Zakona o radu.

Imajući u vidu da su, od dana donošenja rješenja, broj i datum gornji, do danas nastupile nove činjenice i okolnosti, odnosno da je došlo do promjena koje se tiču organizacionih dijelova i članova ovog Sindikata, obraćamo se ovim Zahtjevom da preispitate i reprezentativnost Sindikata radnika u zdravstvu u Kantonu Sarajevo, te pravilno i potpuno utvrdite činjenično stanje i na tako utvrđeno činjenično stanje pravilno primjenite relevantni metrialni propis.

Naime, u sastavu ovog Sindikata, kao njegov organizacioni dio više ne postoji osnovna sindikalna organizacija Univerzitetski klinički centar Sarajevo tako da radnici zaposleni na Kliničkom centru Univerziteta u Sarajevu više nisu članovi ovog Sindikata. Pored te promjene, imamo i promjenu koja se odnosi na nove sindikalne organizacije, tako da u sastavu ovog Sindikata egzistiraju osnovne sindikalne organizacije koje nisu postojale u vrijeme donošenja predmetnog rješenja. Riječ je o dvije osnovne sindikalne organizacij, a to su JU Zavod za sportsku medicinu Kantona Sarajevo i JU Stomatološki fakultet sa klinikama Sarajevo, čiji su radnici članovi ovog Sindikata. Shodno navedenom, kao organizacioni dijelovi i osnovni oblik djelovanja podnosioca Zahtjeva egzistira 17 osnovnih sindikalnih organizacija, a to su JU Opća bolnica „Prim. dr Abdulah Nakaš“, JU Zavod za medicinu rada Kantona Sarajevo, JU Dom zdravlja Kantona Sarajevo, JU Zavod za bolesti ovisnosti, JU Zavod za zdravstvenu zaštitu žena i materinstva Kantona Sarajevo, JU Zavod za zdravstvenu zaštitu radnika u saobraćaju, JU Zavod za zdravstvenu zaštitu studenata Kantona Sarajevo, JU Zavod za zdravstvenu zaštitu uposlenika MUP-a Kantona Sarajevo, JU Zavod za transfuzijsku medicinu FBiH, JU Zavod za javno zdravstvo Kantona Sarajevo, Zavod za javno zdravstvo FBiH, JU Zavod zdravstvenog osiguranja i reosiguranja FBiH, JU Apoteke Sarajevo, JU Zavod za hitnu medicinsku pomoć Kantona Sarajevo, JU



Psihijatrijska bolnica Kantona Sarajevo, JU Zavod za sportsku medicinu Kantona Sarajevo i JU Stomatološki fakultet sa klinikama Sarajevo. Radnici zaposleni u navedenim javnozdravstvenim ustanovama su članovi podnosioca ovog Zahtjeva. U toku su aktivnosti na ažuriranju baze podataka članova Sindikata radnika u zdravstvu u Kantonu Sarajevo, te će Vam podaci o članovima ovog Sindikata biti dostavljeni naknadno, odmah po okončanju ažuriranja istih.

Prilog:

1. Statut Sindikata radnika u zdravstvu u Kantonu Sarajevo – prečišćeni tekst broj: 369/17 od 01.06.2017. godine
2. Odluka o izmjenama i dopunama Statuta Sindikata radnika u zdravstvu u Kantonu Sarajevo – prečišćeni tekst broj: 386/18 od 17.08.2018. godine
3. Potvrda broj: 192/18 od 03.04.2018. godine

Imajući u vidu sve navedeno, kao i da je kod sva tri gore imenovana sindikata došlo do promjene broja članova bilo zbog prestanka radnog odnosa, prelaska u neki drugi sindikat ili drugih razloga, obraćamo se ovim zahtjevom za preispitivanje reprezentativnosti:

1. Sindikata doktora medicine i stomatologije Kantona Sarajevo,
2. Sindikata Kliničkog centra Univerziteta u Sarajevu i
3. Sindikata radnika u zdravstvu u Kantonu Sarajevo

sa molbom da detaljno analizirate i ocijenite akte koji se dostavljaju u prilogu, pravilno i potpuno utvrdite činjenično stanje i na tako utvrđeno činjenično stanje pravilno primjenite relevantni metrijalni propisi.

Molimo da nas pisanim putem obavijestite o donesenim odlukama po ovom Zahtjevu.

Prilog: Kao u tekstu.

Podnositelj zahtjeva
Sindikat radnika u zdravstvu u
Kantonu Sarajevo
Prim. dr Edo Selimčić, predsjednik

Dostavljeno:

- Naslovu
- A/a